



Peta međunarodna konferencija Ekonomskog fakulteta Brčko organizovana je s ciljem okupljanja naučnih radnika i istraživača radi prezentovanja rezultata naučnih istraživanja, razmjene iskustava i rasprave o važnim pitanjima nauke i struke u svrhu donošenja smjernica i odluka u vezi sa daljim naučno istraživačkim aktivnostima. Konferencije se bavila aktuelnom problematikom: "Uloge visokoškolskih ustanova u savremenom poslovnom ambijentu". Doprinos radu Konferencije dao je veliki broj relevantnih naučnih radnika iz Bosne i Hercegovine, Srbije, Hrvatske, Rusije, Velike Britanije i Italije kroz učešće u panel-diskusijama i dostavljanje kvalitetnih radova.



Odabirom interesantne i važne teme željela se naglasiti obaveza visokoškolskih institucija da svojim aktivnim učešćem u kreiranju i razvoju privrednog ambijenta doprinesu unapređenju sveopšte društvene klime i time

barem donekle uspore zabrinjavajući trend iseljavanja radno sposobnog i visokoobrazovanog kadra u zemlje zapadne Evrope. Kroz primjere efikasnog transfera znanja iz visokoškolskih institucija u privredni sektor, panelisti su pokazali koliku važnost visokoobrazovne institucije imaju u kreiranju zdravog i podsticajnog privrednog ambijenta. Konferencija je bila podijeljena u dva dijela: naučni dio sa predavanjima i prezentacijama rezultata istraživanja i drugi „praktični“ u kojem su profesori iz Rusije predstavili rezultate rada multidisciplinarnog tima istraživača sastavljenog od stručnjaka iz oblasti poljoprivrede, hemije i informacionih tehnologija. Konferencija ispunjava visok stepen organizovanosti jer se rezimei publikuju prije održavanja, a radovi nakon održavanja Konferencije u zborniku radova koji zadovoljava međunarodne bibliografske standarde (CIP, ISBN).





